

東
華
續
錄

東華續錄

乾隆六十一

臣王先謙敬編

臣周淪蕃恭校

乾隆三十年乙酉春正月戊申諭今春朕恭奉

皇太后安輿四

巡江浙東南黎庶望幸情殷宜布渥恩用光盛典前此三經臨幸
恩旨疊頒所有江南省積欠地丁等項蠲免至二百餘萬兩維時
地方大吏率多遵循舊例例所應蠲者不論災熟積欠並予豁免
而於因災緩帶之項其中有例不准蠲者轉未獲一體邀恩於情
理未爲允協因思成熟地畝當年出產本豐自不難踴躍輸將年
清年款其陳積未完者實不免豫覲恩膏有心觀望若因災停緩
之糧勢由歲歉不齊致滋通負初非玩戶抗延之比今翠華所過
慶典聿修而此等履薄之黎未蒙濫澤朕心深爲軫念著加恩將

江蘇安徽乾隆二十五年以前節年因災未完蠲剩河驛俸工等款並二十六七八三年因災未完地丁河驛等款以及二十八年以前節年因災未完漕項暨因災出借籽種口糧民借備築隄堰等銀一百四十三萬餘兩又籽種口糧內米麥豆穀十二萬三千餘石槩予蠲免至浙江一省額賦本較江南爲少其積欠亦屬無多著將乾隆二十六七八三年因災未完地丁銀兩並二十七年屯餉沙地公租二十六七兩年未完漕項等銀十三萬二千五百餘兩又二十八年借給籽本穀一萬三千七百餘石加恩悉行蠲免以均惠愷該督撫等其董率所屬實力詳查妥協副朕嘉予元元至意儻有不肖胥吏從中舞弊影射侵漁察出卽予嚴參從重治罪該部遵諭速行○辛亥諭向來選拔貢生定例惟府學推選二名州縣學均係額取一名其江蘇安徽二省有分設各縣仍統

於新舊兩學中彙拔一人貢入成均肄業茲當翠華臨幸正值選拔之年因念分設各邑版籍旣繁膠庠亦盛僅令兩學拔取一人懷才者或不免拘於長格何以昭鼓勵而廣甄陶著加恩將江蘇安徽二省所有分設各縣准於本年選拔時每學各取一人俾得均霑惠澤該學政其悉心秉公遴選務取文行兼優之士用副廣勵學宮至意○癸丑劉綸丁憂命刑部尙書莊有恭協辦大學士以于敏中爲戶部尙書裘日修爲戶部侍郎○調明德爲江蘇巡撫和其衷爲陝西巡撫以彰寶爲山西巡撫調永泰爲江甯布政使恆光爲貴州布政使以喬光烈爲山西按察使

革職湖南巡撫

○丁巳

諭前經降旨八旗三品以上大臣子弟果有嫻熟國語練習弓馬者遇考試之期該父兄自行奏明准其入闈原因八旗醇樸素風近來未免沾染虛浮豔心詭遇且從而釣弋其名淵藪其弊是以

示之節制俾知崇實黜華非槩從禁制遏其進取之途也乃邇年來八旗大臣竟無奏請子弟應試者未免多生顧慮因噎廢食伊等旣不潛心力學而於國語騎射又未見專攻嫻習頓覺出色自不如兼收並進猶可爲造就之資也我國家滿洲世臣宣力贊政者多原不藉文章一途但承平百餘年滿洲詞臣文藻黻飾亦不可少大臣子弟中果能於國語騎射之外兼習文藝在伊等延請師資擴充聞見較之寒素之家成材自易嗣後所有八旗大臣子弟仍准一體考試無庸奏明請旨儻伊等仍不以實學就考如前懷挾或進身之後仍蹈虛浮陋習託名斯文無裨實用朕又何難隨時懲治俾知所做惕乎可將此通諭知之○壬戌 上奉 皇太后啓鑒南巡○癸亥免直隸山東經過地方本年額賦十分之三○甲子免直隸各屬舊欠及未完緩徵銀米○乙丑諭朕奉

皇太后安輿省方問俗凡清蹕所經止令灑掃潔淨毋事華飾屢經申諭而地方大吏以慈駕臨駐旃廬究不若屋宇之安善尙有葺治行館以供憩息者因其義適溫清且成事不說是以不復禁止著於直隸存公項內賞銀二萬兩以裕工作之用再山東新建座落二處亦著賞銀二萬兩充用○諭軍機大臣等輔德奏臬司廖瑛委查素章阿案內護道丁亭私扣銀兩一節並未推究確情止圖率結瞻徇顯然等語廖瑛身任臬司承審事件理宜悉心查辦乃兩次會稟不實不盡自應予以處分以示懲儆已如該撫所奏交部嚴加議處矣至請將張逢堯等一併交議則未免過於張大其事素章阿貪縱不法罪無可逭然亦按律繩治足矣若因一人之不職而司道大員槩望吏議旣於政體未協且恐無識之徒妄疑案外苛求亦不足以昭平允因將原摺刪節交部前因輔

德與素章阿同係滿洲恐其或瞻徇情面是以批令秉公辦理原爲防其流弊今輔德錯會前旨有意從嚴則失之過當朕辦理庶政鑑空衡平從不肯稍存畸輕畸重之見輔德豈尙未之知耶又另摺稱藩司張逢堯才識不足且入冬以來耳稍重聽事每健忘未能擔荷重任等語見在廖瑛已交部議處卽降調朕亦不稍爲姑容若張逢堯復以衰病去官藩臬兩司同時更易辦事亦殊費周章且張逢堯暫時重聽交春後或能向愈亦正未可定此事不妨稍待俟部議廖瑛一案降旨後新授臬司有人彼時再行酌量請旨可傳諭輔德知之○庚午諭吏部請將各部滿郎中與漢郎中一體截取銓選知府等因一摺所奏甚屬非是朕臨御以來滿洲擢用外任者頗不乏人從前雖將截取道府之例暫行停止年來如京察保舉及記名簡錄者遇有監司方面之任未嘗屏而不

用卽以見在藩臬而論滿洲並不少於漢人較之康熙雍正年間滿洲外用者有增無減何轉虞壅滯耶若謂滿漢司員同屬在部辦事欲令其一體升轉以示銓法之平尤爲不揣其本而齊其末殊不思八旗人數與各省漢人孰多孰少顧於銓擢一途強爲衡量如是而謂之平允有是理乎且滿洲漢人同爲國家臣僕朕用人行政一秉大公從不肯稍從歧視吏部此奏亦全不善體朕意矣至摺中所稱漢郎中歷俸三年截取之處尙屬可行但因此而欲飾其改例希恩之迹則未免涉於取巧更爲朕所不取吏部堂官著嚴行申飭摺擲還○免山東濟南等六府屬未完因災緩徵地丁銀兩及借款○丙子以劉星煒爲內閣學士

由翰林院侍讀學士遷

二月己卯封回部台吉色提巴爾第爲輔國公○癸未免江蘇浙江經過州縣本年額賦十分之三以宿遷桃源清河銅山四縣地

土薄瘠免十分之五○甲申諭藩臬兩司俱有奏事之責屢降諭旨甚明乃歷來藩司不過撫拾尋常事件以爲敷陳司臬者亦止請更一二律例卽飭部議行議駁俱於實政無裨至附奏年歲晴雨情形又多倣照督撫所報依樣葫蘆而於地方緊要政務從未見專摺入告此豈朕委令得用奏牘意耶卽如近日豫省河陰縣士民因歸併滎澤聚眾鬪市一案值阿思哈來行在迎鑒該省藩臬雖亦一面具稟一面親往獲犯究審但既可稟知該撫何不可據實奏聞巡撫因公出境兩司同駐會城通省之事實在伊等豈有遇此等重案猶必待巡撫據稟具奏乎雖封疆大吏隨時陳奏兩司固不便攙越然使皆心存顧忌無論事之大小槩不敢自發一言儻督撫中或有敗檢飢法之事勢必將瞻徇隱忍甘於欺蒙而不顧所關更復不小且藩臬爲二三品大員尤非道府等可比

今日之兩司安知不卽爲他日之督撫朕所期待於伊等者甚厚而顧可深自暴棄負簡畀之任耶嗣後藩臬等遇地方緊要事件有應陳奏者卽具摺奏聞儻仍觀望因循及僅以空言塞責必懲其不率以示儆若因有此旨輒復逞私挾詐以行其傾軋督撫之技則是自干重戾更難逃朕洞鑒再從前保舉堪勝知府皆以督撫爲政藩臬兩司均不與聞是督撫各舉所知安保無徇一人之私以薦庸庸者亦不可不防其流弊將來再有應行保舉時並著藩臬會同參覈以昭公慎或所舉非人兩司亦不得辭其咎也將此通行傳諭知之○乙酉廖瑛緣事革職以吳虎炳爲江西按察使由河南河○丙戌命淮徐道李清時隨總漕楊錫祚往山東會辦湖河諸務○戊子祭河神上奉皇太后渡河○閱清口

東壩木龍惠濟閘○己丑江南河道總督高晉奏清口木龍工程

聖駕親臨閱視諭於四架木龍下緊對陶莊積土處添木龍一架俾挑溜全趨北岸衝刷陶莊積土收清黃並流之效臣遵卽勘明應於四龍下相隔一百九十丈處添建擬長五十丈委員覈辦趕伏汛前竣工得旨是○壬辰免江蘇布政使所屬州縣二十八年以前熟田地丁雜款舊欠並經過州縣本年額賦十分之五○癸巳賞原任吏部尙書王安國之子生員念孫舉人○丙申祭江神 上奉 皇太后渡江○丁酉閱京口水師○戊戌諭朕清蹕時巡所有經過地方大臣祠墓在三十里以內者例俱遣官致祭原任大學士史貽直之墓雖遠在溧陽念其宣力年久亦著加恩一體遣祭以示優卹○壬寅吏部議准湖北巡撫王檢奏沔陽州轄新隄地方前署撫愛必達奏准添設文泉縣治將原駐通判改爲知縣鍋鎮巡檢改爲典史請建城垣倉庫監獄在案見查該

處低窪城倉各項俱未興工且於民情不便請將新設文泉縣裁
新隄等處仍隸沔陽卽移該州州同駐紮定爲沿江要缺在外選
補無庸復設通判典史仍改爲巡檢分司隄垸從之○甲辰諭從
前因貝勒弘瞻年幼不肯學好不遵 聖母皇太后懿訓喜事妄
爲屢經訓誨未知悛改是以將伊削爵降爲貝勒誠欲令伊知過
遷善悔悟自新俾得成就伊果能遷善有成則朕自必加恩今覽
御醫所奏知伊患病朕心甚爲憐念恭請 聖母皇太后懿旨封
伊爲郡王想伊聞命欣喜病勢自必速痊弘瞻著封爲郡王該衙
門查例辦理尋宗人府以封號請得旨仍用果字

閏二月丙午朔 上奉 皇太后臨幸蘇州府○ 上謁 文廟

○戊申免浙江歷年未完漕項及仁和袁浦等場未完竈課南米
借款錢塘等處緩徵租穀○己酉免江甯蘇州杭州附郭諸縣本

年地丁銀○免浙江經過州縣本年額賦十分之五○以承德爲

浙江布政使

由杭嘉湖道遷

○庚戌諭海甯石塘工程民生攸繫深廑朕

懷茲入疆伊始親臨相度先視繞城石塘實爲全城保障而塘下

坦水尤所以捍衛石塘但今潮勢頂衝外沙漸刷二層之外若普

築三層於護城保塘尤資裨益該督撫等其董率所屬動帑興修

無濫無浮以收實濟○增江蘇安徽浙江文童取額有差○辛亥

上閱海塘○減江蘇安徽浙江軍流以下罪○壬子 上奉

皇太后臨幸杭州府○癸丑 上閱兵○賜一百七歲之訓導王

世芳 御書扁額及幣○甲寅 上幸觀潮樓閱福建水師○丁

巳諭沈德潛錢陳羣浙江耆宿並以卿貳予告里居曩者省方東

南存問所及特晉尙書階茲時巡莅止二臣咸扶杖迎謁耄耄而

神明不衰朕甚嘉焉其各加太子太傅以寵異之沈德潛之孫錢

陳羣之幼子各賜舉人二臣益欣愉恬養以躋期頤副朕優高年
眷舊臣之意○阿克蘇辦事副都統卞塔海奏辦送沙棗樹科之
烏什回人二百四十名於二月十四夜聚謀城中槍傷綠旗兵副
都統素誠阿奇木伯克阿布都拉登山拒守臣卞塔海於十五日
領兵往援烏什次日抵烏什之喀喇和卓遇賊八百餘人追擊捉
生詢問據供素誠被害阿布都拉被拘禁臣當將烏什城外關隘
據守七十八晝夜擊賊殲百餘人十九有馬步賊出城抗拒殺
賊百餘官兵陣亡七八十名見駐哲爾格濟克德飛咨德福添兵
策應其葉爾羌喀什噶爾兵亦催取赴援諭軍機大臣等卞塔海
奏伊領兵前往烏什捉生詢問知駐紮大臣已爲逆回戕害見在
據城聚眾抗拒官兵等語初意回人小有變亂或不過械鬪案件
今乃戕害官兵焚劫倉庫此因素誠等平時辦理不善以致滋事

而回人等敢行叛亂情罪可恨若不盡行剿絕將來駐紮大臣何以辦事適據明瑞奏一聞德福所報信息卽派觀音保領兵前往此時納世通額爾景額應亦赴援自計日蕺事但逆回潰敗之後必分路潛逃斷不可防範稍疏致使漏網儻有投往額爾德尼伯克處之人卽向伊索取此時卞塔海等辦理若何仍作速奏聞○戊午以錢琦爲四川布政使朱奎揚爲江蘇按察使由糧道還○己未授浙江進獻詩賦之進士張培馮應榴舉人吳壽昌卽用內閣中書賜廩貢生陸費墀舉人授內閣中書○賞原任禮部侍郎蔡世遠之子長汭江蘇巡撫邵基之孫洪舉人○庚申命阿桂明亮赴伊犁辦事○命額爾景額總理軍務明瑞節制各城官兵○甲子上奉 皇太后自杭州回鑾○子沈德潛錢陳羣在籍食一品俸○丁卯諭軍機大臣等卞塔海等奏擒獲烏什回人額伊敏供

稱駐紮大臣等從前派出屯田回人前往伊犁所購馬匹牲畜及採買官糧均未給價又將瘦羊四百隻每隻令回人繳價四兩此項銀兩俱係哈密回人侵蝕至運沙爾樹科之時賴和木圖拉兄弟謀逆伊父額色木圖拉阻止不從因在素誠署前放火拆屋素誠與阿布都拉殺賊數人後見賊勢愈眾先殺其子復行自盡阿布都拉被擒以女與賴和木圖拉之子爲妻始未殺害等語前據提生詢問阿布都拉被回人拘禁朕尙以阿布都拉係玉素布之弟必不肯屈節今觀伊平日縱容所屬侵蝕回人銀兩又納女於賴和木圖拉希圖臨難苟免此與叛逆何異豈可以其爲玉素布之弟遂從寬貸著傳諭明瑞伊至烏什之日務將此等情節查訊明確若果所傳不妄非獨逆回等當族誅示懲卽阿布都拉亦當明正典刑其運送木植累派回人之處俱著查明具奏○戊辰輔

德卒調明山爲江西巡撫王檢爲廣東巡撫以李因培爲湖北巡撫○己巳調范時紀爲倉場侍郎李宗文爲工部侍郎以程巖爲禮部侍郎○賜新築伊犁河駐防城名曰惠遠門東曰景仁西曰說澤南曰宣闡北曰來安喀什回城名曰懷順○庚午以范時綬爲吏部侍郎由副都統遷○是月湖廣總督吳達善奏迎鑾後於閏二月初六日回任得旨覽今用李因培爲湖北巡撫此人甚能辦事學問亦好但未免自恃其才好居人上又係初任民事一切汝宜留心若有不妥善爲規勸彼若不聽據實奏聞此人久未擢用亦欲折鍊其氣質今覺比先改觀但恐其志滿則終於易盈負朕造就之意耳

三月丙子朔 上幸焦山○諭昨因烏什回人叛亂會諭嚴懲首惡宥其脅從今卞塔海等既進攻數次而納世通至彼尙未竣事

是逆回等助惡者多情節實爲可惡觀音保見在領兵前往若烏什回人等稍知畏懼或擒獻首惡乘間納降是其情尙屬可矜儻督不畏死仍行抗拒必俟我兵全至力竭始降自不得槩從寬貸著傳諭明瑞納世通等得城之後必嚴行查辦不可稍事姑息至叛犯婦女毋庸解京見在安插之厄魯特等鰥居者甚多應送往伊犁酌量給配其烏什城亦不可留徑行拆毀以其地給回人耕種俱著明瑞等遵照辦理○辛巳 上奉 皇太后駐蹕江甯府○壬午 上詣 明太祖陵奠酒○臨視織造機房○癸未 上閱兵○甲申圖爾炳阿卒調馮鈐爲湖南巡撫以朱邦綬爲廣西巡撫湯聘爲陝西布政使沈世楓爲湖南按察使由安徽甯太道遷○乙酉諭軍機大臣等納世通等奏稱閏二月十九日領兵進攻烏什賊人數次敗潰追至城濠剿殺頗多雖甚驚懼但恃險死守難於

卽克聞明瑞領兵二三日內可至卽會商進剿務期殲滅以安各城反側之心等語近據納世通等將進剿烏什無須明瑞前來行文阻止之處具奏朕卽屢加申飭以納世通所見非是觀其行止斷不能竣事此次所奏愈覺不堪明係始以辦理烏什爲易慮及分功今乃知其難又復巧爲遮飾甚屬無恥至所稱安撫各城尤爲悖謬烏什業經叛亂尙何安撫之有若指其餘各城則見在回人俱感激朕恩捐輸口糧牲隻領兵協助又何待於安撫蓋納世通方寸已亂將效力回人俱視爲敵國尙可倚以集事乎卽如攻城一事若克一城又有一城不得不急圖進取今死守者止此一城自當俟其困極自潰而納世通等株守城下兵疲力竭如此是納世通等全不曉事著傳諭明瑞此事惟伊是賴一切俱自行決斷不可稍有推諉又據德福奏稱烏什未亂十日前有布魯特等

乘閒將阿奇木伯克阿布都拉所牧羊隻及牧人家屬十五名口掠去等語此等布魯特雖事發在前而相去不遠焉知非賊人等已陰相約結乘露搶掠明瑞到彼務將此事情節查明辦理將起意爲匪之人正法示眾德福又稱納世通所失礮位並非大威遠礮從前係伊誤奏等語近因納世通卞塔海俱將失礮之處奏請議處已交明瑞查辦並著於竣事後查明參奏○授江蘇安徽進獻詩賦之舉人鄭淦張熙純卽用內閣中書賜拔貢生鮑之鍾等九人舉人授內閣中書○丙戌祭江神上奉皇太后渡江○丁亥果郡王弘瞻薨諭照親王例辦理喪事遣皇六子永琮成服子祭葬諡曰恭○甘肅狄道州地震○禮部侍郎雙慶以辦理部務錯謬降調○甲午諭軍機大臣等據卞塔海奏稱明瑞領兵於閏二月二十七日至烏什與納世通等會議明瑞觀音保攻城

之東面納世通卞塔海鄂實攻城之西面等語明瑞已抵烏什既經定議夾攻何以具奏者僅卞塔海一人著傳諭明瑞伊知卞塔海有此奏否如知之何以不言若明瑞不知而卞塔海私自爭先具奏不知是何意見况此議雖定究未舉行卽限行六百里馳奏尤爲可詫著明瑞據實陳奏毋稍隱諱此次辦理軍務納世通卞塔海德福等乖張錯謬之處皆交與明瑞查明參奏但明瑞性情朕所深悉諸事惟委靡推讓伊若於此事不量輕重爲周旋世故之舉斷不能逃朕洞鑒且將來若命阿桂續查伊能當其咎乎至明瑞定議攻城東面或因地利屬緊要但東路通阿克蘇賊若逃潰必由西走是西面亦屬要地納世通等又豈能防其逃逸且盡獲要犯耶朕甚爲伊等念之仍將進攻情形作速奏聞○乙未祭

淮神 上閔高家堰隄祭 河神 上奉 皇太后渡河○召尹

繼善入閣辦事以高晉爲兩江總督李宏爲江南河道總督高晉

仍統理南河事務以李清時爲河東河道總督

出淮徐河道還

○丙申諭

軍機大臣等明瑞奏稱三月初一日東西夾攻烏什剿殺賊眾二

百餘人等語此次進攻方謂之奮勇剿賊且奪據山隘斷其樵牧

尤爲知要觀音保負傷效力愛隆阿在雅爾聞明瑞前往烏什卽

遣恆璜協助甚屬可嘉俱賞給荷包觀音保仍賜號卓哩克圖巴

圖魯賞銀一百兩效力之侍衛官員兵丁及陣亡得傷人等俱著

明瑞查明交該部分別議敘議卹○己亥以額爾景額爲禮部侍

郎○壬寅諭據明瑞奏稱素誠在烏什平日將回人種種科派苦

累伊父子及辦事筆帖式等任意姦淫回人婦女此次辦送濟克

得木植素誠將伊子派出押運沿途行李俱令回人背負以致所

派之人甚多並將小伯克賴和木圖拉亦行派出而賴和木圖拉

之妻從前又曾被素誠留宿因此蓄有嫌怨遂至作亂至卞塔海領兵到烏什時並不查訊致亂緣由輒行施放烏槍至第三日用礮攻打城門回人始行出拒而卞塔海遽爾敗北奔至七八十里之外致將步兵百餘名礮三座俱沒於賊再阿克蘇喀什噶爾大小伯克平日視印房等處辦事人員極爲畏懼而納世通卞塔海妄自尊大其接見領隊大臣侍衛等較從前軍營將軍參贊體統尤尊至待所屬辦事各員反覺過優昨觀音保援兵至彼納世通等卽撥給回兵二百名令供樵汲使用觀音保不敢留用等語納世通卞塔海素誠俱受朕深恩身爲大臣各駐專城辦事乃素誠父子在烏什任意將回人科派苦累且姦其婦女納世通卞塔海平日妄自尊大一聽所屬官兵將回人陵辱折挫至辦理烏什一事卞塔海初到時並不查訊起釁緣由輒用槍礮攻城至賊眾出

拒又不能奮勇抵敵竟將步兵百餘名斃三座俱行棄失敗走七
八十里並將此等情節帶圖隱匿不卽據實奏聞而納世通領兵
甫至彼處始則恐明瑞爭功行文阻止繼復懇求援助無恥實甚
彼時明瑞若聽其阻止寬行撤回尙不知釀成何等事端且正當
撫輯未生事之回眾令其傾心出力之時反撥給觀音保回兵二
百名以備使令是又具何肺腑卽此撥兵一節其平日之任意苦
累更不問可知納世通下塔海種種背謬乖張不可枚舉由此觀
之烏什之始而激變繼而聽賊猖獗不能立時完結者皆伊等卑
鄙無恥庸妄僨事之所致實堪髮指此內素誠情罪尤屬可惡雖
經自戕不足蔽辜著交留京辦事王大臣將素誠家產查抄其見
有之子俱著革退差使發往伊犁充步甲當差納世通下塔海之
罪雖不至將伊子一併治罪而伊等本身斷難寬恕所有納世通

卞塔海治罪之處另降諭旨外其二人家產俱著查抄明端摺一併譯發○諭軍機大臣等據明瑞查奏素誠納世通卞塔海等情事朕已節次覽悉故一切專委明瑞辦理又命阿桂前往協辦阿桂至烏什卽同明瑞傳旨將納世通卞塔海於軍前正法看來烏什回人雖罪在不赦亦大臣等擾累所致自宜分別辦理著傳諭明瑞此時如尙未克城卽將查奏情事宜諭招撫若抗拒如前仍盡行剿殺至善後事宜已派永貴前往喀什噶爾將來陸續辦理阿桂著速赴烏什一切事宜與明瑞會議具奏明瑞先回伊犁阿桂留烏什數月俟事定後與永貴交代再往伊犁接辦明瑞所管事務明瑞於來年回京亦可俱著傳諭知之○癸卯以官保爲工部侍郎○乙巳河東河道總督李宏等奏永濟神白英導汶濟運功垂不朽請選嫡派子孫給八品頂帶承襲奉祀從之

夏四月辛亥諭原任刑部尙書王士正績學工詩在本朝詩人中
流派頗正從前未邀易名之典宜示褒榮以爲稽古者勸著大學
士察例議諡具奏尋予諡文簡○諭甘肅布政使員缺著海明補
授所遺按察使員缺著周景柱調補河南按察使員缺著何燭補
授何燭久任河工於一切修防事宜素爲熟悉所有豫省南北兩
岸河道工程仍著何燭兼管○丁巳 上奉 皇太后駐蹕德州

○戊午命簡親王豐訥亨等恭奉 皇太后由水程回鑾 上登

陸○己未諭各省道員副將及駐防協領等照例俸滿引見停止
督撫將軍保奏○庚申諭江南淮揚淮徐二道向係兼管河工地
方之缺嗣據原任兩江總督德沛奏請將海防道裁汰改設爲淮
徐海道專管三府州事務並將揚州一府歸常鎮道管理而令原
設之淮揚淮徐二道專管河工久經部議允行今思河防分巡均

屬地方要務原不應過分畛域見在淮揚淮徐二道專理河務而分巡之事不令兼司於地方官呼應不靈遇辦理一切工程未免掣肘且山東之兗沂曹河南之開歸河北各道俱不難於兼顧江南又何獨不然著將淮徐二府地方分巡事務仍歸淮徐河道兼管其揚州府地方分巡事務仍歸淮揚河道兼管俾事權歸一以資實效其添設之淮徐海道一缺卽行裁汰所有一切裁併應行事宜及見任淮徐海道應如何酌留另補之處著該督撫詳悉妥議具奏該部可遵諭行○丙寅 上還京師○庚午 止至三間房恭迓 皇太后鑾輿居暢春園

五月丙子轉四達爲刑部左侍郎以綽克托爲刑部右侍郎○丁丑諭巡視臺御史前已降旨三年簡派一次事竣卽回無庸留駐候代今思該處見有道鎮大員駐紮一應地方事務俱可隨時

經理而向來巡察御史在彼並未聞有所建白原屬有名無實若
遽行裁撤則地方官或以遠隔海洋無人稽察日久不免廢弛亦
不可不防其流弊嗣後屆三年請派之期該衙門仍照例奏請或
暫停派往或數次後派員一往巡查候朕隨時酌量辦理其盛京
等五處分班閒派稽察亦照此例行○戶部侍郎錢汝誠請回籍
養親允之○多倫哈子伯克阿瑞謀叛伏誅○庚辰調王際華爲
戶部侍郎以陸宗楷爲兵部侍郎由祭酒遷○乙酉 上臨果恭郡王
弘瞻殯所及閒勤親王奇通阿園寢賜奠○庚寅賜哈薩克阿布
賚敕諭曰昨爾所遣恭請朕安之鄂托爾齊等來京瞻覲朕顏覽
汝表文並據鄂托爾齊口奏布魯特帶兵入爾哈薩克遊牧戕害
多人掠去牲畜無數仰乞睿鑒等語前據駐紮伊犁大臣奏稱巡
察塔爾巴哈台等處路過爾哈薩克之鄂羅木拜等稟稱阿布勒

比斯帶兵二千餘名將布魯特人畜搶掠無數彼此講和完結哈薩克布魯特俱係仰慕皇風爲朕藩服朕一視同仁毫無軒輊今汝奏稱布魯特侵擾爾哈薩克然汝之阿布勒比斯帶兵二千餘名擄掠布魯特而回爲我大臣所遇布魯特若以爾等入彼遊牧擄掠人畜入告朕將以誰爲直耶看來爾二部彼此搶劫習以爲常爾等兩處遊牧係屬比鄰理宜彼此和睦守分安居互相劫掠最爲惡習兩俱無益布魯特擄掠汝等一事汝使人來後爾等哈薩克亦將布魯特搶掠報復業已講和完結嗣後爾等當感激朕恩恪遵訓諭改革搶掠之習循分安居戒除貪圖小利之心則長受朕恩各享昇平之福矣此事布魯特並未入奏伊卽入奏亦照此旨曉示無論何人朕不偏袒也外特賜阿布賚蟒段文綺若干爾其祇受朕之恩賜並賞來使鄂托爾齊三品頂翎額喀克拜吐

魯根摩呼資雅爾監博渾五品頂帶薩噶爾哲爾格齊薩坦巴朗
阿達伯克六品頂帶及前次賞給三品頂翎之瑪穆特五品頂翎
之和通額哩葉伯克和屯鄂羅滿圖滿等十七人服飾器用銀兩
有差再爾奏請人獲等藥俱如所請賞給爾一併祇領○辛卯京
師地震○癸卯明瑞等奏烏什軍務甚要納世通卡塔海平日
辦事糊塗此次舉動尤爲錯謬奉旨將納世通卡塔海嚴拏正法
卽令觀音保明亮前往接辦納世通等分兵西北若解至臣營相
距數十里恐其聞信自戕未能明正國法臣等卽派領隊大臣觀
音保明亮前往將納世通卡塔海交與侍衛訥蘇等護送前來稟
稱拏二人時齊集侍衛官員伯克宣讀諭旨回人布魯特俱歡喜
告語至愛隆阿伍彌泰因伊犁事繁不便遠離德福向在阿克蘇
雖辦事糊塗近頗知省改可否暫行寬宥俟綽克托伊勒圖到時

再將伊革職治罪報聞○甲辰諭前因烏什之事朕以回人斷無
無故作亂之理必係彼處大臣官員等將伊等苦累不堪致啓釁
端因交明瑞查奏嗣據明瑞等將納世通平素妄自尊大於辦事
人員過爲寵信等款陸續奏聞今柏琨又將納世通在喀什噶爾
從前帶領回人行圍並主事烏爾袞任意勒索回人毆冒伯克種
種劣蹟查奏各城駐紮辦事大臣俱身受朕恩爲一城統領大員
自應潔己率屬安撫回眾卽偶爾行圍藉以操練官兵原屬可行
但止應帶內地兵丁至於回人俱以耕種爲生乃常派其出圍以
致伊等廢時失業有是理乎曾見內地大臣有帶領農民行圍者
乎實屬悖謬不堪再回部伯克俱係恩賞職銜品級之人該管大
臣固不可過於優容亦不可任意陵踐至官員等尤非大臣可比
烏爾袞不過一主事耳竟敢將散秩大臣阿奇木毆辱實出情理

之外此皆大臣等平日過於寵信所致若不重治其罪何以示懲
是以降旨交明瑞阿桂等將納世通下塔海治罪外並將烏爾袞
等審明定罪著傳諭各城辦事大臣嗣後各宜守身潔己善視伯
克一切事務秉公辦理屬下人員嚴加約束毋令擾累回眾以納
世通爲炯戒著通行曉諭知之

六月己酉李侍堯丁憂以楊廷璋署兩廣總督董邦達兼署工部
尙書○癸丑定八旗世職疏遠宗派及駐防兵丁不准承襲例○
乙卯冊封 令貴妃魏氏爲 皇貴妃○甲子諭軍機大臣等明
瑞等奏稱賴和木圖拉中箭殞命賊眾仍另立伯克等語逆賊久
抗大兵罪深惡極未得生擒寸磔已屬倖免而賊眾仍一心死守
情罪可惡惟遵節次諭旨盡行剿殺拆毀其城不必多留官兵酌
派能事員弁一二人領兵屯田聞該處所產硝磺甚多應廣爲採

取運解各城備用俱著於事竣後悉心商辦○丙寅以故果恭郡王弘瞻子永璫襲爵○丁卯諭朕恭閱世祖章皇帝實錄內載大學士甯完我劾奏陳名夏之疏有與魏象樞結爲姻黨一款朕向聞魏象樞在漢大臣中尙有名望乃與黨惡之陳名夏聯姻藉其行私護庇則亦不得謂之粹然無疵之名臣矣因取國史館所撰列傳止稱以事降調而不詳其參劾本末則後之人亦何由知其事爲何事而加之論定乎向來國史館所輯列傳原係擇滿漢大臣中功業政績素著者列於史冊以彰懿懋其無所表見及獲罪罷斥者槩屏弗與第國史所以傳信公是公非所關原不容毫釐假借而瑕瑜並列益足昭衡品之公所謂據事直書而其人之賢否自見若徒事鋪張誇美甚或略其所短暴其所長則是有褒而無貶又豈春秋華袞斧鉞之義乎且以眾所共譽之魏象樞尙

有瑕隙可抵非今日因事檣聚誰復摘其隱微若罪惡顯著之陳
名夏及楊義所參交結黨援之孫承澤俱曾身爲大臣特以身名
隕越國史攢而弗書將世遠年湮更無有知其罪狀之昭宣與夫
糾彈之顛末伊等轉得以文詞著述掩蓋其生平則其餘美惡參
半之人境過事忘因而彌縫隱護者益復不少卽如索額圖明珠
徐乾學高士奇輩當時非不藉藉人口而迹其行事或則恃才自
恣或則倚附結納交通聲氣雖學問或有可稱而品誼殊無足取
此等若非官爲立傳則世人毀譽任情久益流傳失實且其載之
家乘大率不外乎行狀墓誌非其子若孫志在顯親卽其門下士
工於諛墓將必自撰私傳轉至揄揚溢分徵實難憑昔年滿洲醇
樸之風從無是事而世代遞降薰於習染一二性喜詩文之人生
前唱和吹噓身後假他人筆墨誇張阡陌者亦頗有其人矣卽如

索額圖明珠揆敘阿靈阿等皆以世臣勲閥身罹愆尤國史槩從
擯斥久之且不知其爲何人又何以爲一代汗青之據前命廷
臣編纂宗室王公功績表傳見已告成事實釐然可考因思大臣
之賢否均不可隱而弗彰果其事功學行卓卓可紀自應據實立
傳俾無溢美若獲罪廢棄之人其情罪允協者固當直筆特書垂
爲炯戒卽當日彈章過於詆毀更議或未盡持平亦不妨因事並
存毋庸曲爲隱諱從前國史編纂時原係彙總進呈未及詳加確
覈其閒秉筆之人或不無徇一時意見之私抑揚出入難爲定評
今已停辦年久自應開館重事輯修著將國初以來滿漢大臣已
有列傳者通行檢閱覈實增刪考正其未經列入之文武大臣內
而卿貳以上外而將軍督撫提督以上並宜綜其生平實蹟各爲
列傳均恭照 實錄所載及內閣紅本所藏據事排纂庶幾淑慝

昭然傳示來茲可存法戒朕將特派公正大臣爲總裁董司其事
以次陸續呈閱朕親加覈定垂爲信史著該總裁官將作何蒐輯
酌定章程不至久稽時日之處詳議具奏○庚午諭從前承襲簡
親王爵時朕較量房分加恩令奇通阿承襲當時以伊已襲王爵
將本身所有公爵裁汰今閱王公表傳奇通阿所襲公爵係伊祖
父父子陣亡加恩承襲之爵則其王爵係伊家內公同有分者此
公爵不宜裁汰且豐訥亨此次軍營甚屬奮勉雖賞給雲騎尉世
職而承襲王爵之後亦已裁汰論伊祖之勞績及豐訥亨見在軍
營奮勉行走此公爵理宜加恩賞給伊家令其承襲此特褒獎功
績之意卽如以皇子分封之爵承襲時朕往往降等承襲其軍功
所得之爵卽獲罪譴仍令其子孫世襲罔替庶使有功者可以永
受國恩而軍前奮勉者亦可以昭鼓勵著交宗人府將豐訥亨家

內應行承襲公爵之子弟查明帶領引見○巴里坤墾地四千餘畝○壬申以富德爲兵部侍郎

由內閣學士遷

東華續錄

臣周澐蕃恭校

秋七月甲戌朔諭前因明山參奏糧道王槩浮收倉米賣銀入己一案業經革職發審擬以斬候昨據刑部代伊奏請贖罪因思從前廣東糧道明福曾以浮收斛面等弊被參審擬治罪復經徹底查辦自應宿弊一清何得復有王槩之案且此十餘年中任糧道者不止一人如歷任道員並知潔己自愛而王槩獨干法紀則但不准贖罪秋審時必且入於情實予勾若歷任相沿陋弊而道員之或參或否止憑督撫之愛憎爲是非又豈足以示平允因降旨令李侍堯明山逐一詳悉查奏今據李侍堯等奏稱自查辦明福以後梁肅鴻范時紀李珏陳于中任內俱不敢多收及富明安

到任斛面又漸加增此後多寡不一而富明安及金烈熊繹祖又俱有折銀入己之事是其弊非始於王槩乃富明安於積弊激清後復敢開浮收折價之端與王槩原參時情罪無異而金烈熊繹祖之效尤染指亦不能因其或故或升不加窮究可見前此督撫之未經舉劾非袒庇姑容卽漫無覺察均不得辭其咎矣卽王槩而論蘇昌素稱其能事則曲爲保全明山不喜其爲人則登之白簡察吏糾貪惟憑一己之好惡又能逃朕之洞鑒乎朕辦理庶政一秉至公從不肯畸重畸輕稍存成見此案既經查明自當分別辦理富明安熊繹祖俱著革職押解廣東交與楊廷璋明山拘提案內應質人犯嚴審定擬具奏其餘歷任道員有無似此情弊仍著逐一確查毋稍隱飾王槩既係因仍積弊尙可量爲寬貸著刑部查照前奏加恩准其贖罪李侍堯等摺並發並將此通諭中外

知之○乙亥以高積爲貴州按察使

由江蘇驛道遷

○己卯諭軍機大

臣等明瑞奏派兵設伏勦殺賊眾毀棄糧食阿桂亦稱賊食將盡俟調兵一至即可攻圍等語看來伊等意見尙謂逆賊以死據守克復甚難雖窮蹙至此猶必待其自斃是從前未曾力戰可知卽如所奏賊人尙在城外設立水磨儲積糧石則伊等前此並未近城或較納世通下塔海駐紮之地爲稍近耳又如明瑞在城東駐紮今至西北埋伏亦屬可疑西北一帶係阿桂觀音保駐紮何以未聞會合策應昨據明瑞奏稱將擒獲牲口幼弱無用者發遣入城以分其口食且使之內潰是尙欲招降不知何意又欲於城之四周掘成深塹益屬錯謬烏什四面皆山若盡行鑿鑿當於何時可竣伊等辦理竭蹶卽此可見明瑞阿桂著嚴加申飭再明瑞等雖東西分營駐紮仍須一體籌辦烏什並非大城東西相隔必不

甚遠焉可仍蹈覆轍各存畛域將來功過伊二人同之務遵朕節
次諭旨一心協辦不可稍有推諉之見○諭昨據成衮扎布奏稱
桑寨多爾濟私與俄羅斯貿易朕命阿里衮查辦去後並派軍機
章京往張家口稽查陸續據報桑寨多爾濟將皮張物件於張家
口等處售賣因命大臣等將桑寨多爾濟丑達家人提訊並據供
吐實情看來私行貿易屬實桑寨多爾濟自幼養育內廷受恩深
重於停止俄羅斯貿易後理宜嚴加查禁今乃首先給票射利深
負朕恩阿里衮瑚圖靈阿審訊後自應將伊被處什物入官但伊
家產係伊祖丹津多爾濟所遺若一併入官朕心不忍今桑寨多
爾濟雖獲重譴朕必擇丹津多爾濟子孫量賞官爵給予舊產著
傳諭阿里衮等除伊祖父舊產外俱著入官至額爾經額係派往
庫倫辦事之人大臣如此執法既不阻勸又不報部且昨據桑寨

多爾濟之護衛等供稱伊係知情則其罪更難寬宥索琳身受朕恩特旨令其協同桑寨多爾濟辦事理應留心詳察當成衮扎布初奏此事時朕卽著伊查奏乃竟扶同捏稱並無此事諒伊甫到庫倫未必卽與桑寨多爾濟合夥但無論果否知情卽其含糊具奏罪亦難寬將此傳諭阿里衮等一併查辦○辛巳 上奉 皇太后啓鑾秋獮木蘭○壬午免經過州縣本年額賦十分之三○癸未諭軍機大臣等前據成衮扎布奏恰克圖地方並未停止貿易等語朕曾令索琳等查明具奏乃索琳扶同桑寨多爾濟掩飾並不據實陳奏今知阿里衮到彼查辦恐其敗露始行請罪殊屬不堪索琳著革去副都統自備資斧管理恰克圖卡兵在章京上效力贖罪著派福鼎同瑚圖靈阿駐紮庫倫辦事福鼎所遺理藩院侍郎原缺著伍勒穆集署理○丁亥 上奉 皇太后駐蹕避暑

暑山莊○戊子勒爾森卒以觀保爲左都御史

由兵部左侍郎遷

○辛卯

甘肅隴西等十二州縣地震○甲午諭軍機大臣等據錢琦奏請刪賦役全書內不經之名目一摺稱川省見值修刻書內載有起運蜀府草束銀兩之類不一而足此皆由前明賦役繁重以致多設科條自我朝釐定典章此等不經名目何得尙沿舊文至見在錢糧款項列入奏銷者最爲簡明應請遵照刊刻等語川省如此恐他省如此者亦復不少著傳諭各該督撫通飭藩司逐一詳查凡涉瑣碎不經名色槩行芟除畫一辦理可於奏事之便通諭知之○以期成額爲兵部左侍郎

由副都統遷

○乙未諭軍機大臣等據

額爾景額奏稱原任總兵和誠重利盤剝回人及折收金兩之處俱經審訊明確請將和誠解交明瑞再行覆訊擬罪等語和誠係特簡和闡辦事大員似此貪婪敗檢大干法紀實出情理之外可

傳諭明瑞等將和誠卽在該處正法示眾仍傳諭回人等知之○
諭據明瑞奏稱六月二十九日兩營合勢進逼賊城等語是伊等
從前距賊巢尙遠今始近薄其城耳官兵屢次進剿賊眾惟以死
相拒非痛加懲創不可著傳諭明瑞等將所獲生口俱卽正法得
城之日遵朕節次所降諭旨辦理我兵旣直逼城下而五福之兵
亦到不爲不多務宜晝夜巡防俾賊眾不得休息絕其芻牧斷其
樵採並於隘口嚴行偵候斷不可使一賊竄逸此次烏什賊眾雖
屬小醜而兇狡實甚官兵及厄魯特布魯特等不避矢石有進無
退甚屬可嘉卽前此平定準噶爾及回部時似此格鬪之事亦少
著明瑞等於事竣後將奮勉效力勞績出眾者查明分別奏聞候
朕加恩優敘至明瑞身爲將軍辦理無策以致曠日持久免咎足
矣何可言功並傳諭知之○以高恆爲戶部右侍郎由兩淮鹽政遷○丁

西諭軍機大臣等奏案多爾濟係公主之子自幼養育內廷襲郡王爵受恩甚重後喀爾喀等騷擾時伊操心堅確毫無動移又微著勞績朕以此愈加眷注晉封親王補授副將軍遣往庫倫辦事今乃與俄羅斯私行貿易實出意料之外本應從重治罪姑念從前勞績著加恩革去王爵解京閒住令其閉門思過但此郡王爵係伊祖丹津多爾濟軍功所封伊雖獲譴與伊祖無涉著該院將丹津多爾濟子孫內應行襲爵之人帶領引見以郡王爵承襲

八月壬子改延綏鎮歸西安提督管轄○乙卯諭軍機大臣等據瑚圖靈阿奏稱俄羅斯綽爾濟喇嘛丹巴達爾扎等遣索特巴裏稱伊等遊牧地近邊境情愿歸順天朝但恐被俄羅斯追索致生事端請於和好改約時歸順方妥並探恰克圖停止貿易之故再請歸順時遣卡兵邀迎等語丹巴達爾扎等遣索特巴來稟特以

我停止恰克圖貿易或構兵端如不歸順伊等遊牧地近慮先受
害若豫歸順又恐我擒執送還故來採取確信著傳諭瑚圖靈阿
如丹巴達爾扎等遣人再來瑚圖靈阿卽云我皇上統一區宇外
藩慕仁歸化無不容納爾若果輸誠歸順代奏後必加恩收留如
恐執送俄羅斯則從前俄羅斯曾收留我國逃人舍楞等此時豈
有將爾等送還之理至於恰克圖貿易特因俄羅斯近年諸事推
諉不能卽速完結且增加稅額以致物價昂貴是以停止並非欲
構兵端備俄羅斯敢於滋事彼時再行裁度丹巴達爾扎等如欲
歸順聽從其便否則亦無抑勒之理若請遣兵邀迎我天朝亦斷
不行此誘人之事曉諭後遣還可也○己未 上自避暑山莊巡
幸木蘭行圍○癸亥黑龍江將軍富僧阿等奏據往探格爾畢齊
河源之副都統瑚爾起稟稱自黑龍江至格爾畢齊河口計水程

一千六百九十七里自河口行陸路二百四十七里至興堪山其間並無人煙蹤迹又往探精奇哩江源之協領納林布稱自黑龍江入精奇哩江北行至托克河口計水程一千五百八十七里自河口行陸路二百四十里至興堪山其地苦寒無水草禽獸又往探西里木第河源之協領偉保稱自黑龍江經精奇哩江入西里木第河口復過英肯河計水程一千三百五里自英肯河口行陸路一百八十里至興堪山地亦苦寒無水草禽獸又往探鈕曼河源之協領阿迪木保稱自黑龍江入鈕曼河復經西里木第河入烏默勒河口計水程一千六百十五里自河口行陸路四百五十六里至興堪山各處俱無俄羅斯偷越等語查呼倫貝爾與俄羅斯接壤之額爾古納河西岸係俄羅斯地界東岸俱我國地界處處設有卡座直至珠爾特地方見復自珠爾特至莫哩勒克河口

添設二卡於索博爾罕添立鄂博逐日巡查俄羅斯鼎瑪爾斷難
偷越其黑龍江城與俄羅斯接壤處有興堪山縣互至海亦斷難
乘馬偷越第自康熙二十九年與俄羅斯定界查勘各河源後從
未往查嗣後請飭打牲總管每年派章京驍騎校兵丁六月由水
路與捕貂人同至托克英肯兩河口及鄂勒布西里木第兩河閒
徧查回報總管轉報將軍三年派副總管佐領驍騎校於冰解後
由水路至河源興堪山巡查一次同時呈報其黑龍江官兵每年
巡查格爾畢齊河口照此三年亦至河源興堪山巡查一次年終
報部得旨如所議行○乙丑命江蘇海州及贛榆沐陽河務分巡
改歸淮徐道管理○丁卯諭軍機大臣等據明瑞阿桂等奏烏什
平定後酌議駐兵一事朕已諭將該處城垣不必拆毀各城駐紮
大臣當以烏什爲總匯之地著永貴駐紮辦事其阿克蘇毋庸駐

纂大臣官兵卽移於烏什綽克托亦著協辦烏什事務兼轄阿克
蘇喀什噶爾事雖不繁柏琨一員尙覺不足著與額敏和卓同辦
事務其各城大臣仍依舊制烏什等城俱聽伊犁將軍管轄隔一
二年親往各城巡查一次至烏什地頗肥饒多駐綠旗兵似於屯
田有益一切駐兵籌餉事宜著明瑞阿桂等會同詳議具奏

九月戊寅明瑞等奏克復烏什諭明瑞等奏稱八月十五日克復
烏什城等語烏什賊眾敢行叛逆據險死守久抗大兵甚屬可恨
今罪人斯得著傳諭明瑞遵節次所降諭旨辦理此次烏什一事
進剿半年僅能克復明瑞阿桂俱朕簡用之將軍大臣如此辦理
遲滯幸免於罪足矣豈當復予議敘其在事官兵俱各奮勉效力
較從前平定伊犁回部時戰功猶覺過之著明瑞等將官兵內著
有勞績及陣亡得傷者分別查明具奏交部議敘議卹其烏什駐

紫大臣官兵之處俱遵前旨行○己卯諭據楊廷璋等奏稽查廣東歷任糧道張曾張嗣衍王槩梁國治蔡鴻業又護道龍廷棟各任內俱有浮收折價之事除張嗣衍已經病故張曾告假回籍見咨河南行提王槩見在粵東就近質審外其侍郎梁國治蔡鴻業知府龍廷棟三員請旨革職並令交出管倉家人一併發粵質審等語該省浮收斛面一事自查辦明福之後卽不應復有此弊乃富明安首先復犯情罪自爲較重至歷任各員亦不應因仍積弊其浮收多寡不過視莅任之久暫稍有不同若不按律治罪無以服眾人之小梁國治蔡鴻業龍廷棟及告假回籍之張曾俱著革職與摺內有名人犯一併發往該省撫質審定擬具奏○庚辰調程景伊爲吏部左侍郎以劉星煒爲禮部左侍郎由內閣學士遷○以何逢億爲刑部右侍郎由吏部郎中遷○甲申上奉皇太后駐蹕避暑

山莊○丙戌賞已故河南巡撫胡寶瑑之子鼎蓉舉人○戊子諭
前以國史原撰列傳止有褒善惡者惟貶而不錄其所以爲惡人
究不知非所以昭傳信也因降旨開館重修特派大臣爲總裁董
司其事並令詳議條例以聞今據該總裁等議奏開館事宜內稱
滿漢大臣定以官階分立表傳旗員自副都統以上文員自副都
御史以上及外官督撫提鎮等果有功績學行及獲罪廢棄原委
俱爲分別立傳等語所議尙未詳備列傳體制以人不以官大臣
中如有事功學術足紀及過迹罪狀之確可指據者自當直書其
事以協公是公非若內而部旗大員循分供職外而都統督撫之
歷任未久事實無所表見者其人本無足輕重復何必濫登簡策
使僅以爵秩崇卑爲斷則科道中之或有封章建白實裨國計民
生者轉置而不錄豈非缺典且如儒林亦史傳之所必及果其經

明學粹雖韋布之士不遺又豈可拘於品位使近日如顧棟高輩
終於湮沒無聞耶舉一以例其餘雖列女中之節烈卓然可稱者
亦當覈實兼收另爲列傳諸臣其悉心參考稽之諸史體例折衷
斟酌定爲凡例按次編纂以備一代信史至立表之式固當如所
定官階爲限制仍應於各姓氏下註明有傳無傳使覽者於表傳
並列者卽可知某某之媿惡瑕瑜而有表無傳者必其人無足置
議有傳無表者必其人實可表章則開卷瞭然不煩言而其義自
見朕每覽歷代史冊褒譏率無定評卽良史如司馬遷尙不免逞
其私意非阿好而過於鋪張卽怨嫉而妄爲指摘其他更可知矣
我朝百餘年來於大小臣工彰善癉惡一秉至公實可垂爲法戒
今悉據事覈實立爲表傳總裁大臣公同商榷朕復親爲裁定傳
之萬世使淑慝並昭而褒貶不爽不更愈於自來秉史筆者之傳

聞異辭而任愛憎爲毀譽者耶將來成書時卽以朕前後所降諭旨弁之簡端用示慎重修輯國史之意○己丑 上奉 皇太后自避暑山莊回鑾○辛卯諭明瑞阿桂等奏稱烏什賊眾擒獻首惡已分別正法及送往伊犁辦理等語昨據伊等奏報克復烏什語甚含糊距今十二日始以查辦賊眾具奏而所辦又極乖張錯謬卽如賊人戕我大臣官兵以死拒守及長圍久迫始縛獻首惡希冀苟免誅戮準以天理人情豈復可赦惟盡以軍法從事始足申國憲而儆愚頑乃辦理半年不能速爲擒剿仍待賊眾窮急自獻始稱竣事豈不貽各回部布魯特人等嘲笑且朕屢降諭旨特以此等回人逞兇肆惡若不大示懲創將來或效尤滋事轉非辟以上辟之道今伊等既從事姑息著將送往伊犁人等卽交二人養贍再伊等從前請於烏什駐兵屯田朕已諭令籌議今另摺所

奏忽將五福所領綠旗兵撤回何錯謬至於此極所有官兵來往資糧俱著伊二人償補且前諭得城後查覈素誠阿布都拉等一切情事原欲詳其顛末傳諭中外而額色木圖拉旣擒亦應訊取確供再正典刑乃一味草率完結不知伊等十數日來所辦何事由此觀之則所查正法之賊人亦皆聽信人言未能脗合情理此必明瑞顧念家室早欲回京而阿桂亦思早至伊犁更替明瑞阿桂著交部嚴加議處俟烏什事竣均卽往伊犁候旨尋吏部議請革職得旨著革職從寬留任○癸巳河南巡撫阿思哈奏豫省運河發源輝縣之百泉南注三十里至新鄉縣全河尖與丹水合又一百五十里繞衛城北爲兌漕水次又東北至濬縣會淇水達湯陰內黃受湯河洹河二水迤邐至直隸大名縣張兒莊入臨清河前河撫諸臣議於水入下游建草壩二十六座束水濟運並照東

省挑浚查夏秋盛漲無須收蓄一交冬令來源既涸支派甚微糧
艘開時水落沙停草壩又屬無益不若於上游來源處先期蓄水
臨時開放春夏兼灌民田自開兌至糧艘出境止堵閉民渠俾盡
歸官渠濟運每年官爲經理原議草壩請停修築至濬縣十八里
溜之三官廟老鶴嘴等處爲善化山根石柱砂礪最爲險要該處
鹽商業捐貲開鑿溜勢寬平其餘閒斷浮砂應照舊例飭印汛官
於八九月集夫創挖報聞○免浙江二十六年民欠南米○甲午
以鍾蘭枝爲內閣學士

由翰林院侍讀學士遷

○乙未

上奉

皇太后還

京師○丙申諭游擊以下不得護理鎮篆○丁酉諭舉人選用知
縣需次動至三十餘年其壯歲獲售者旣不得及鋒而用而晚遇
者年力亦復就衰每爲軫惜朕嘗中夜思維所以疏通壅滯之
法因查每科中額一千二百九十名統十年而計加以恩科則多

至五千餘人而十年中所銓選者不及五百人除各科會試中式外其曾經揀選候選者尚餘數千經久愈多遂成壅積而直省知縣員缺本止有此數即使一時槩行銓用亦屬缺少人多不能使人人皆紆墨綬此固必然之勢也而不知者或歸咎於捐班之占缺因復覈計捐班所選每歲亦不過三四十人縱令盡予舉班仍屬無幾卽如近日部旗所辦世職扣欠官項一事言者輒云世職承襲因代扣欠項不能食俸者甚多朕聞之惻然因命查豁則統計旗員世職共一千九百六十八員除本身借欠應扣止二十餘萬兩外其代扣官項者纔一百五十八員應銀四萬餘兩此項雖名爲代扣其實子襲父職應行接扣者則有三萬九千餘兩之多而承襲族中世職代扣還項者止數千餘金夫父借子還世之常理豈得謂之代人扣賠可見前此扣項代還旗員多累之說盡屬

無稽浮議之不足憑大率如此見在捐例已停自可無虞占缺卽或將來再議開捐其知縣一條不必載入捐款至向來吏部截取舉人例由各省督撫咨送往往意存姑息不加甄別及至部選得缺經九卿驗看始以衰庸改補教職是督撫徒欲博寬厚之名使此等衰邁之人僕僕道途終歸無益所謂愛之適以害之也嗣後各該督撫於舉人截取領文時留心驗看如果實在精力已衰難膺民社者或該員情願就教卽於本省呈改以省跋涉之勞其有自揣耄齡不願就銓者並令彙冊咨部請旨酌給職銜以慰其寒窗積學之志明歲丙戌春聞各省舉人雲集當於會榜後特派大臣分別挑選引見量其年力才具及時錄用其有科分已深非因下憂事故自分年老才庸不願赴京會試者亦聽其自便其作何給予職銜如何挑選錄用及選班中更有如何可以疏通之處著

大學士九卿會同詳議以聞以副朕體恤寒畯及時登進羣才至意

冬十月甲辰諭明瑞阿桂等辦理烏什回城一事外謬之處不一而足已降旨交部嚴加議處但所奏摺並未發鈔眾人不悉其中原委或疑回人既已平定何以不行議敘轉加議處今將伊等奏摺鈔發俾眾共知之卽如今春烏什逆回賴和木圖拉等因素誠激變據城抗拒特命明瑞阿桂帶領官兵前往辦理伊等初至時朕因烏什蓋爾孤城又無外援易於收服官兵毋庸悉銳攻城輕擾鋒鏑是以令伊等惟嚴圍困之計使賊回勢窮力蹙則乘機攻勦尤爲事半功倍今圍城已經半載逆回窮糧乏絕馬斃人饑自生離叛此時攻取易若摧枯況旣知賊眾內潰並聞城內倉皇救火聚集驚惶卽當統率大兵悉力攻城誅殺賊眾以揚我武乃兵

已臨城尙退列壘內及經回眾將要賊獻出始行入城復關閉城門收獲槍礮弓箭種種示怯全不知奮勇任事則回城之復定尙得謂由伊等收取耶我國家定鼎之初兵威丕振雲梯所向立破堅城從未有稍存畏葸退縮不前之事不謂伊等於烏什彈丸之地選懦周章至於如此實損我國威伊等罪乃在此也至素誠等苦累回人姦淫回婦各情節雖從前得之俘囚之口今額色木圖拉等正犯既經就獲理應嚴訊起數緣由及素誠所犯是否屬實使情罪確鑿乃成信讞而眾共曉然方結此事之局伊等一槩置之不問輒稱將賊黨正法有是理乎明瑞阿桂此次辦理節節錯謬不得不交部議處以示懲創其在事將弁兵丁仍交部分別議敘朕辦理庶務一秉大公賞罰悉期允當此天下臣民所共知而於軍令賞罰之際更所慎重茲將伊等原摺譯發使眾閱看自知

其辦理之無紀緒也並宣諭中外知之○以廣桂爲內閣學士

由員

外郎

○乙巳恆光因病解任以良卿爲貴州布政使龔舒爲雲南

按察使○戊申諭軍機大臣等劉藻奏滇省五華書院山長張甄

陶自主講席以來迄今五載實能盡心訓迪著有成效請令爲黔

省貴山書院山長俟屆滿六年撫臣就近考覈或照例奏請議敘

或送部引見示獎臨期再行酌辦等語所奏甚是已如議行矣省

會設立書院所以樂育人材前經降旨令督撫等慎選山長如果

教術可觀六年之後著有成效奏請酌量議敘原以山長爲多士

觀摩若徒視爲具文漫無考覈既無以爲激勸之資則日久因循

未免怠於訓課惟知戀棧優游諸生或且習而生玩恐於教學無

裨且在籍閑居之人未嘗無端謹績學可主講席者若實心延訪

使之及瓜更代自必鼓舞振興共相淬勵方不負設館育材之意

乃自降旨以來各督撫並未見有遵旨具奏者卽如齊召南之在
敷文書院廖鴻章之在紫陽書院豈止六年之久何以從前未經
辦及朕所知已有二人恐各省似此者尙復不少著各該督撫將
因何不遵旨辦理之處查明具奏嗣後均以六年爲滿秉公考察
分別覈辦庶於勸學程功均有實濟著傳諭各督撫知之○癸丑
軍機大臣等議奏會典載坐褥親王冬用貂世子郡王冬用猓猓
孫緣貂親王與上用制同無以示別應令親王用猓猓孫緣貂
世子郡王貂心緣猓猓孫又軍器部載盔纓式都統鷗翎二貂纓
副都統蕭纓尾紅纓直省督撫提鎮與都統同查直省各鎮於乾
隆十八年改正二品受總督節制盔纓應改用蕭纓尾與副都統
同副參以下改用纓尾與參領同至兩翼前鋒統領八旗護軍統
領向用鷗翎貂尾應並改正又禮服冊敬載 皇帝冠服於卷首

軍器部甲冑制自親王始查大閱盛典 御用甲冑制度與禮服等重應敬載卷首從之○戊午諭軍機大臣等據阿爾泰奏新墾地畝分別升科及續墾荒地見在飭令地方官招集墾戶妥協安置並查明承業認糧確數以資清理一摺朕因阿爾泰於地方本計水利農田事務向能留心經理此事諒非虛飾是以聽其舉行其實墾地升科本係良法但辦理不善轉致累民卽如當日田文鏡查辦墾荒一事將升科銀兩灑派花戶徒務開墾虛名小民無授產之益而受加賦之累前車深足爲戒今阿爾泰見在籌畫招墾不可不慎之於始如果實有曠土可耕能化荒蕪爲腴壤固於惠養黎元之實政有裨但恐有司辦理不善或迎合邀功以無報有勢必貽累閭閻所關正復不小著傳諭該督務須加意查辦得其藝闢收穫之實據計畝起科使小民永享耕田鑿井之利切勿

爲屬員所蒙蔽以致有名無實徒滋擾累此事利弊所繫惟責成該督悉心體察耳○辛酉吏部議奏各省舉人截取時例由督撫驗看分別知縣教職咨部候選但意存姑息甄別不審知縣得缺後經九卿改補教職徒多往返之勞應請嗣後各督撫於接到部文日定限一年行文調取各舉人據實驗看其年力尙健堪膺民社者給咨赴部候選願就教職者准在本省具呈若年在七十以上不堪供職免其調取驗看該督撫題請賞銜舉人已經揀選原係候選知縣應從優以中書科中書大理寺評事太常寺博士等銜由吏部掣定奏請賞給其已經截取願得職銜者亦照此辦理各省舉人約一萬有餘每科會試不過四五千今奉恩旨挑選明歲來京會試者必多難槩令就挑從前壬申辛巳兩科會試後挑選新科舉人不與今擬再扣一科壬午乙酉兩科俱不准就挑

至見任教職來京會試舉人向准就挑查該員已登仕版俸滿可升知縣且截取時仍得歸班銓選應毋庸與挑通計各省知縣共一千二百八十五缺此內升調遺缺准挑選人員題補乾隆十七年並二十六年挑選分發舉人二年餘俱即用完明歲就挑人多數應加增前次大省四十員應加二十中省三十員加十五小省二十員加十各帶領引見請旨以知縣教職分用其分發知縣者約計不過十之五六各省陸續請署請補不致壅滯其以教職用者數年內即可得官其年力已衰未經入選願受京銜者准其具呈卽交派出揀選大臣查實奏請賞給中書科中書等銜將來卽不與截取再查舉人應選班次有知縣直隸州州同盟庫等大使三項銓例知縣雙月用五甲五舉四捐三升單月用四補四升四甲四舉共計雙單月各班內舉人應得九缺捐班無人以舉人抵

補將來捐例人員用完後其抵捐舉人改爲舉抵班又可多用人員直隸州州同向係專用舉人後因捐例議准雙月用二舉一捐單月用一補一舉一捐今請改雙月用四舉一捐單月用一應補一舉兩班後用捐納一人如應補無人以舉人抵選鹽庫等大使缺出向例一補一捐應補無人專用捐班俟捐納用完後再將已經截取舉人帶領二人引見錄用今請改爲一補一捐一舉如應補無人以舉人抵用再知縣係舉人應選正途近各省每以同知州判知州等員借補知縣銓缺更少嗣後應不准借補舉人可以多選向例試用人員遇該省升調遺缺始准題補續經奏准揀選舉人發往各省試用者不拘升調缺槩准題補原係暫行今例捐知縣用完升調缺止補舉人且或遇部選人員未到或本省出差升調縣缺乏人皆可委署丞倅等缺出亦得暫攝挑發之員不致

守候無期若槩令題補歸部選缺無幾截取候選舉人又多壅滯嗣後舉人分發各省試用者仍照舊例止准題補升調遺缺至挑選人員以教職銓補者向俱先行選用查學正教諭雙月內有升選教習恩拔副榜等班單月內有舉人應補及恩拔副榜應補應選各班今令挑選舉人槩行壓班未爲允協請嗣後雙月用挑選舉人二員後將班內應用一員選用一人單月將挑選舉人與應補應選人員輪用此次疏通之後二三年內挑發之員即可用完應於會試之期請旨挑選從之

十一月壬申朔裁潘桃口監督歸張家口監督管理○乙亥大學士管陝甘總督楊應琚奏巴里坤附近田地漸闢迤西四十餘里之花莊抵尖山卡座沃衍二十餘里黑溝之充足資灌溉舊渠漏沙處俱經修整並開新渠一道由舊渠上流抵尖山柵口長三十

里傍山地盡可耕認墾者聞風趨赴自二十六年至今共墾地三萬八千餘畝得旨欣慰覽之○丙子分特訥格爾兵五百移駐呼圖畢○丁丑撥官帑修理各省城垣停止勸捐○允李治運回籍終養以圖桑阿爲浙江按察使○戊寅諭向來奉天府尹事務令盛京將軍兼轄今思將軍與府尹所屬旗民事件各有專司若令將軍節制於公務未免牽掣莫若照京城侍郎兼管順天府尹之例於盛京五部侍郎內派出一員管理永著爲令於體制更爲畫一見在奉天府尹事務卽著雅德兼管○己卯諭各省書院延師訓課向有山長之稱名義殊爲未協旣曰書院則主講習者自應稱爲院長著於各督撫奏事之便傳諭知之○甲申命明噶特鄂拓克人戶交科布多大臣管轄撤回喀爾喀兵○乙酉以傅森爲內大臣調託恩多爲吏部尙書託庸爲兵部尙書馮鈐爲安徽巡

撫李因培爲湖南巡撫以湯聘爲湖北巡撫

由陝西布政使遷

○調錢琦

爲江西布政使張逢堯爲四川布政使○調程燕爲陝西布政使

以富尼漢爲安徽布政使富勒渾爲山東按察使

由山西冀南道遷

○庚

寅諭恰克圖貿易一事近因俄羅斯不遵舊制違背禁約甚且多

收貨稅苦累商人是以降旨停止原以俟其自知悔過抒誠祈請

再准其通商貿易恐桑寨多爾濟身係蒙古未能深曉事宜復派

大臣前往稽查彈壓協同辦理其所以責成者甚重當桑寨多爾

濟起意私通交易時丑達係特派大臣理應正言阻止阻之不從

卽應據實參奏乃不惟不行阻止參奏並且通同舞弊貿易多次

覈其贓私竟至數千兩之多藐法營私殊出情理之外及經拏解

來京尙敢冀稽顯戮在途延捱負恩喪心實屬可惡此斷不可以

一日容留丑達已依擬正法至額爾經額係隨往司員若丑達等

恪遵禁令嚴絕貿易則額爾經額決不敢自行罔利其情罪較丑

達稍輕是以改爲應斬監候此中輕重權衡朕惟一秉至公毫無

成見期協乎情罪之至當而已可將此曉諭中外並軍營辦事大

臣知之○壬辰封 皇五子永琪爲和碩榮親王○甲午五吉以

徹底革職以新柱爲理藩院尙書

由西安將軍遷

○己亥諭據楊應琚奏

甘肅蘭山書院於去歲延請丁憂在籍之府丞史茂來主講席一

摺此甚非是史茂係回籍守制之員理應閉戶家居以盡三年之

禮至讀禮之餘或在家課訓子弟自屬分所應爲古人尙有廬墓

終制者卽不能取法亦當杜守里門若竟佳居省會書院教授生

徒與地方官長賓主應酬則與居官何異此不過冀得膏火以資

贍給遂置禮於不問微特人子之心難安其又何以爲多士表率

乎督撫有維持風教之責摺紳中積學砥行足備師資者諒不乏

人何必令丁憂人員覲居講席是應聘者固不能以禮自處而延請之地方大吏亦復不能以禮處人於風俗士習頗有關係恐他省不無類此者特爲明切曉示通諭知之○命阿桂赴雅爾辦事換安泰來京○辛丑裁廣東韶州惠州肇慶倉大使改瓊州倉大使爲雷瓊道庫大使高州倉大使爲高廉道庫大使

十二月戊申諭阿桂此次辦理烏什地方甚無章程暫且不必來京所有工部尙書員缺著蘊著補授蘊著所遺綏遠城將軍員缺著嵩椿補授○丁巳諭方觀承奏籌辦城工一摺內稱界連驛路之懷安等縣土城見在勘估改建孰城其餘偏僻小邑仍就土城黏補修葺工費較省等語所奏尙未悉辦理城工之本意前因各省應修城垣費繁工鉅特發庫帑五百萬兩分撥各省一律興修止期於衛民有益雖多費亦所不較况頻歲年穀順成庫藏極爲

充裕因思天下之財止有此數庫中所積者多則民間所存者少
用是動撥官帑俾得流通而城工亦賴以完整此朕本意也且國
家一應工作料物皆按值購辦食用亦計日給資閭閻不但無力
役之煩而無業窮民並得藉力作以餬口實寓以工贖民之意是
一舉而數善咸備更無庸較量工費意存節省至土城改建甌城
雖見在爲費略多其實壯觀瞻而資鞏固且省不時修葺之勞視
土城尤爲經久卽出於原估五百餘萬兩之外正亦何妨朕惟期
有益於民豈計所費之多寡乎但承辦之地方官能實用實銷不
致浮開糜帑則工程自然堅固而夫役工料等事皆實發價值絲
毫不科派里下庶於民生實有利賴前已降旨令各督撫遴委大
員分辦經理以專責成如各省或有土城應改建甌城者並著一
體確估覈奏該督撫等務飭督辦各員實心查察設致不肖有司

冒銷侵蝕草率了事及藉端擾累者若經發覺則該督撫不得辭
重咎著將此通行傳諭知之○己未賜七世同居之陝西涇陽縣
貢生張璘 御製詩章及幣○庚申諭軍機大臣等據劉藻等奏
莽匪竄入猛摔等土司地方肆行焚掠見在飭派營協各員調兵
進剿並親往督辦一摺此等醜類野性難馴敢於擾害邊境非大
加懲創無以儆兇頑而申國法劉藻等既經調兵進剿必當窮力
追擒擒其巢穴務使根株盡絕邊徼肅清恐劉藻拘於書生之見
意存姑息僅以驅逐出境畏威逃竄遂爾苟且了事不知匪徒冥
頑不靈乘釁生事視以爲常前此阿溫波半扎乃占一案未嘗不
重治其罪甫經半載仍敢怙惡不悛卽其屢擾邊界已屬罪無可
追此次若復稍存寬縱難保其不再干犯養癰貽患之說尤不可
不深以爲戒著將此傳諭劉藻知之○諭高晉具題審擬段成功

縱容家人書役詐擾累民一本內稱該員因患瘡昏迷不能檢點案牘家人龔玉等婪贓各款該員均未知覺等語所辦甚屬錯謬段成功不過一時患瘡並非重證且瘡或閒日一至或一日一至亦不過一二時辰之久此人人皆知之高晉獨不之知乎何至不能檢點案牘一任家人等肆行無忌明係承審之員有意開脫冀圖從輕完結耳高晉自擢用總督以來甫經審辦參案卽意存瞻徇巧爲嘗試此等伎倆豈能逃朕洞鑒設使尹繼善在彼敢於如此辦理朕必重治其罪江南吏治廢弛已久見在正當督撫更換之時高晉尤宜加意整頓力矯積習何意竟敢於姑息蒙混若此看來此案必出自朱奎揚之意朕知朱奎揚素非善類不過因其在道任年久又有議其不能得尹繼善歡心者是以擢而用之若係交伊獨任其事伊必不敢姑息若不涉彼身之事督撫在前

則袒護隱飾冀博屬員咸悅高晉遂墮其術中漫無覺察耳本應將該督交部嚴加議處第念高晉新任總督初次獲咎且在總河任內尙能實心任事姑容寬宥此後若再不知改悔必不能爲之曲貸也高晉此事實屬昏愎糊塗負朕恩矣著傳旨嚴行申飭此本已交內閣擲還該督另委賢員秉公確審務得實情以成信讞若尙迴護希圖了事朕必有另辦之法可惜朕造就高晉之恩矣大不是豈有此理著將此傳諭高晉知之仍令高晉傳諭朱奎揚令其小心○辛酉閩浙總督蘇昌奏江陰團塹次增闕請設大使駐紮裁福場三小團併赤杞團兼管添設海壇鎮哨捕兵從之○諭州縣不得委署本府州印○是歲朝鮮來貢